

四庫全書

史部

欽定四庫全書

史部

河南通志卷十四

詳校官監察御史_臣莫瞻菴

檢討_臣德生覆勘

總校官編修_臣王燕緒

校對官編修_臣勵守謙

謄錄監生_臣李元位

欽定四庫全書

河南通志卷十四

河防三

河防考

明太祖洪武八年正月河決開封府大黃寺隄百餘丈詔河南參政安然集民夫三萬塞之

洪武十一年十月開封府蘭陽縣河決傷稼詔免其租

十一月開封府封邱縣河溢詔免其租

洪武十四年七月河決原武祥符中牟諸縣

洪武十五年二月河南水災人饑命駙馬都尉李祺往賑之

洪武十六年六月河溢滎澤陽武二縣

洪武十七年正月彰德府臨漳縣河決於磁州築堤以障之

八月河決開封府東月堤自陳橋至陳留橫流數

十里又決杞縣八巴河命戶部遣官督所在有司塞之

洪武十八年九月詔修黃河沁河漳河衛河沙河諸隄

洪武二十年河決開封府城自安遠門入沒官民解宇甚衆

洪武二十三年七月河南河水漂沒民居命賑恤之又西華等縣雨河水暴溢溺民田饑甚命賑之

是年詔築歸德府鳳池河防

河決鳳池漂沒民居夏邑永城更甚
有司不以聞民詣闕訴之故有是命

洪武二十四年三月開封府陳留睢州歸德夏邑
寧陵河水暴溢被患者千三百七十四戶遣官往
賑之未幾陳州項城亦奏河溢民饑仍遣官賑之
是年河決原武之黑洋山東經開封府城北五里
又南行至項城縣經潁州潁上縣東至壽州正陽
鎮全入於淮而故道遂淤

洪武二十五年正月河決開封府之陽武縣浸淫及於陳州中牟原武封邱祥符蘭陽陳留通許太康扶溝杞十一縣有司乞發軍民修隄防詔免今年田租十月發開封等府民及安吉等十七衛軍修築陽武縣河防

洪武二十九年四月罷開封府馮陵十字河龍堂快活林傘兒三里萬龍及陳州東橋凡八牕是年詔修宜陽河防

先因洛水泛溢宜陽漂沒田廬殆盡至是藩臣請修命預治磚石俟農隙時為之

洪武三十年正月詔除黃河兩岸河泊所魚課

先是河決懷慶府州縣民人貧困上命除懷慶而下至正陽河口黃河兩岸魚課聽民採魚給食

八月河溢開封府

時城三面受水將浸及軍儲倉巨盈庫詔令於漿陽高阜處築倉庫以待之

十一月蔡河南徙入陳州

先是河決由府城北而東行至下流淤塞故又決而之南也

成祖永樂元年八月修安陽縣隄

九月工部言陳州西華縣沙河水溢沖決堤堰以通黃河傷民禾稼乞趁農隙量起民丁修築從之
永樂二年五月修孟津縣河隄

九月修武陟縣馬由隄岸又河南守臣言開封府城為河水所壞命發軍民修築之

十月河水溢命城池有缺者即修之

永樂三年二月河決馬村隄即時修治

永樂四年八月修陽武縣黃河隄岸及中牟縣汴

河北隄

永樂五年三月藩陽中屯衛軍士唐順言衛河之源出輝縣西北八里太行蘇門山下其流自縣北逕衛輝城下入大名府濬縣界迤邐入海南距黃河陸路五十里若開衛河距黃河百步置倉廩受南方所運糧餉轉致衛河交運公私兩便

按此未開會通之先糧由陸運至彰德府故唐順此言為上策今則無用矣

七月黃河泛溢河南傷稼

十一月彰德府湯陰縣河水泛溢沒民田一百九十一頃有奇免其租

永樂六年正月武陟縣知縣言去年淫雨沁水衝決隄岸自縣東關至北賈村等處宜及時修築從之

永樂七年正月陳州衛言河水沖決城垣三百七十六丈護城隄岸二千餘丈請以軍民兼修從之
永樂八年五月至八月淫雨黃河泛溢壞開封舊

城被患者萬四千一百餘戶沒田七千五百餘頃
遣戶部安撫之

十二月守臣言汴梁河決壞城二百餘丈宜及時
修理即遣官往視

永樂九年二月修武陟縣沁河決口

三月浚河南黃河故道遣工部侍郎張信相視信
訪得祥符縣魚王口至中灤下二十餘里有舊黃
河故道岸與今河面平浚而通之則水勢可殺遂

繪圖以進詔發民丁十萬命興安伯徐亨工部侍郎蔣廷瓚率運木夫同侍郎金純開浚丁夫給糧賞且蠲今年田租又遣定國公徐景昌以太牢祀河戶部侍郎古朴祭河南境內山川時工部尚書宋禮督工開會通河遂命兼董之至七月乙酉訖工自是河循故道與會通河合而河南之水患息矣

四月命戶部開河有自願効力開疏民丁一體給

糧賞免租稅

七月遣官視新開黃河隄岸舊為水所溢悉增築之

永樂十年四月宋禮奏臣自衛輝至直沽視河岸低薄非止一處若不究其源析其流但務修築隄岸恐冲突不免臣視會通河至魏家營灣與土河相連宜於彼開二小河以泄土河則無漫衍之患又德州城西北亦可開小河一道蓋自衛河岸東

北至舊黃河一十三里內五里舊有溝渠五里係
古路二里係平地今開通泄水以入舊黃河至海
豐大沽河入海凡四百五十里約用夫三千餘人
十日可完

六月鄆陵臨漳二縣驟雨河水壞堤岸沒田禾又
陽武縣河決中鹽堤二百二十餘丈漫流中牟祥
符尉氏諸縣遣工部主事簡芳按視回奏堤當急
溜之冲夏秋雨水泛漲往往決弛請以新開河岸

捲土下埽樹椿捍禦之庶不至重為民害從之

九月工部主事蘭芳言天下之水惟河為大故水患惟河為甚今於中灤分導河流使由故道北入於海誠萬世之利然緣河新築護岸埽座止用蒲繩泥草不能經久臣以為若用木編成大圓若欄卷然置之水中以椿木釘之中實以石却以橫木貫於椿表牽築堤上則水可以殺隄可以固詔從之

按芳輿載信同用木固即王延世竹絡遺法皆有成功古人之法不可不知也

永樂十一年八月遂平縣河決堤岸漂民居壞田稼遣官撫視修築

十月修滎澤縣大賓河堤

永樂十二年八月河溢壞開封府土城二百餘丈遣官修築

九月修武陟縣郭村馬曲等土堤五百餘丈

閏九月因河患徙陳州馬驛於沙河北岸

是月修開封府土城百六十餘丈

永樂十四年七月河決開封等府十四州縣

永樂二十年十月工部言開封府仁和門外土城
離黃河五里餘河自邊村經獨樂岡南入淮北河
決而西蕩齧城堤雖屢修築旋復沖決宜浚故道
以弭災患從之

永樂二十二年九月河溢祥符陳留鄆陵太康陽
武原武諸縣傷稼敕免田糧遣官賑卹

宣宗宣德元年七月黃汝二河溢開封府之鄭州及陽武中牟祥符蘭陽滎澤陳留封邱鄆陵原武九縣南陽府之汝州河南府之嵩縣漂沒廬舍田稼

宣德三年九月河溢開封府之鄭州祥符陳留滎陽滎澤鄆陵杞中牟洧川十縣免其租

宣德五年十月南陽府山水漲冲決河岸淹没人畜詔蠲其賦

宣德七年六月巡撫侍郎于謙奏開封府祥符中

牟尉氏扶溝太康通許陽武夏邑八縣去年黃水
冲決堤岸淹沒民田乞豁除租稅從之

宣德九年正月新鄉縣知縣許宣言比年沁河水
溢冲決馬曲灣經獲嘉縣至新鄉水深成河繞城
垣城北又滙為潭蓋因馬曲灣堤岸不堅所致乞
令懷慶府督工堅築上命工部議工以時興役

英宗正統元年七月河決開封府堤岸傷稼

正統二年四月巡撫于謙奏開封彰德河南懷慶

衛輝五府所屬州縣自去年閏六月以來天雨連綿河水泛溢其糧窮乏為免除從之

九月開封府陽武原武滎澤三縣秋雨河漲決堤岸三十餘丈發民二萬軍七千修築

正統三年七月巡撫于謙奏開封府陽武縣河決武陟縣沁河決直隸廣平順德二府亦奏漳水決俱傷禾稼遣官覆視且修築沁河堤

正統四年六月淫雨開封衛輝彰德三府河漲漂

民居傷稼命戶部遣官覆視以聞

正統五年七月開封彰德諸府自五月至七月淫雨河漲命遣官覆視以聞

正統八年七月久雨黃汴二水溢壞堤堰甚多詔隨宜修築

正統九年七月開封衛輝懷慶三府河溢

正統十年九月河決金龍口陽穀堤張家黑龍廟口命亟修之

十月睢州祥符祀陽武原武封丘陳留安陽臨漳
武安湯陰林縣涉縣河決淹沒民田無算敕河南
三司率夫修之

正統十二年七月河決滎澤命工部尚書石璞治
之

正統十三年五月河決陳留縣金村堤及黑潭南
岸既築復決命軍夫協力修築之

七月河決河南八柳樹口

在衛輝府
新鄉縣

漫流山東曹

濮抵東昌壤沙灣等堤傷民田廬無算命工部右侍郎王永和往視發工修築

河自正統十三年決陳留金村堤徙經開封西北榮澤縣孫家渡口入汴河至壽州入淮是年又溢蒙陽東過開封城西南經陳留入渦口又經蒙城至懷遠東北而達於淮焉至景泰七年始塞沙堤之缺而張秋運道復完按漢文帝時河決酸棗武帝而後則決於穀子決於館陶分為屯氏河東北入海至元成時河始決東郡分流於博州後又決平原決渤海決信都皆東北出青冀之境以達海自東漢歷魏晉隋唐以及宋初並鮮河患迨仁宗時始決大名神宗時始決澶州曹村北流斷絕河道南徙東瀕於梁山灤分為二派一合南清河入於淮一合北清河入于海黃河入淮自茲漸觴矣

舊黃河在開封府城北四十里至洪武二十四年
河決原武縣故道遂淤至是又決滎陽縣過開封
府城之西南而城北之新河又淤自是汴城在河
北矣隋唐以前河自河淮自淮各自入海宋中葉
後河合於淮以趨海此古今河道遷徙之大變然
前代河決不過壞民田廬而已今之河決則併妨
漕運而關國計故治河視
前代尤急本續文獻通考

正統十四年三月工部右侍郎王永和言黑洋山
西灣已通水從秦通寺資運河東昌則置分水閘
設三空泄水入大清河歸於海八柳樹工猶未可
用沙灣堤宜時啟分水二空瀉上流庶無後患從

之

景帝景泰三年四月遷原武縣

先是河決治城俱淪沒古卷縣址去舊治
十餘里地頗高故遷之本明景帝實錄

景泰四年六月巡撫河南王暹奏黃河舊從開封
府北轉流東南入淮不為害自正統十三年改流
為二一自新鄉八柳樹決由故道東經延津封丘
入沙灣會通河一自滎澤漫流原武開封由扶溝
通許洧川尉氏臨潁鄆城陳州西華項城太康等

處皆經六七州縣約有二十餘里而開封為害尤甚雖築堤三十餘里然沙土易壞不即修築必及城垣請於不被災府衛州縣起倩軍夫倍築大堤以防後患從之

七月開封衛輝南陽三府各奏淫雨連綿河水泛溢乞免租稅遣官覆視

八月戶部養病主事鍾成奏黃水沖決被患莫甚於原武北自舊黃河黑洋山界南自古汴河陳橋

舖界相去五十餘里水皆灌浸縣治居其中於今已六七年矣男欲耕而無高燥之地女欲織而無蠶桑之所乞敕有司疏濬築塞以消水患轉運隣近糧儲以備賑濟從之

是年命官塞沙灣決口乃更作九堰八閘以制水勢復於開封府金龍口銅瓦廂等處開渠二十里引河水東北入運河

景泰六年六月河決開封府高門堤二十餘里詔

修築之

景泰七年河決彰德府

英宗天順元年三月工部奏河南祥符縣護城大堤衝決千餘丈不即修築恐妨城垣請令三司於無災州縣起夫修築從之

十月黃河泛溢原武滎澤二縣田禾淹沒命戶部覆視

天順三年戶部奏開封府所屬祥符等縣天順二

年河水沒民田一千六百三十二頃應免秋糧從之

天順四年六月雨河溢決堤傷稼令官覆視

八月河南都指揮使奏請修築開封府土城從之
天順五年六月霖雨黃河漲七月初四日決汴梁
土城至初六日復決磚城北門城中水深丈餘官
舍民居一空藩府官眷各乘筏避城外高處民死
者無算許州襄城亦奏水決城門淹沒官民廬舍

命工部侍郎薛遠設法築塞疏濬撫卹被害之家
於是年九月十二日起工至明年二月二十六日

輟工

九月雨彌旬河溢開封南陽河南懷慶衛輝汝寧
六府宣武河南睢陽三衛漂居民田舍命戶部覆
視以聞

是年河自武陟徙入原武而
獲嘉縣之流絕本禹貢雖指

天順七年二月布政司照磨金景輝考滿至京奏

黃河國初在封丘後徙康王馬頭去城北三十里
復有二支河一由沙門注運河一由金龍口達徐
呂二洪入海正統戊辰決滎澤轉趨城南并流入
淮舊河支河俱堙漕河因而淺澁景泰癸酉因水逼
城命築堤四十餘里勞費甚大而水發輒復傾潰
然尚未至決城壕為人害也至天順辛巳水暴至
土城既決磚城遂崩公私廬舍盡沒男婦溺死不
可勝計皇上憫視元元遣工部臣薛遠往治雖稍

平復而人心尚爾疑懼臣惟黃河四瀆之宗天下
之水莫大者也今不循故道而併流入淮是為妄
行為今之計在疏導之以分殺其勢若止委之一
淮仍作隄防之策恐開封終為魚鱉之區矣不此
慮者或謂疏浚之事勞費不任殊不知欲為長久
之計雖勞費弗足計不愈於累年修築之勞費哉
或謂濬河不如遷城此无其妄者城為民設水患
不息民困未已城何為焉又况所費不貲豈易為

哉臣愚則始終惟疏濬之是計也乞敕該部計議
移文巡撫河南右副都御史賈銓令所在三司先
以金龍口河開浚寬濶俾水通流以接漕河仍相
度舊河或令有泄水之處講求古法斟酌時宜而
興工開挑不必計其速成務為經久之計合用軍
夫皆給以器具口糧則勞而弗怨費而弗傷何水
患之不息哉工部以其言頗合時議請敕吏部如
例陞擢即命往同河南管河叅議何陞如其言而

行之仍命右副都御史賈銓總督而責其成功從之

憲宗成化十四年春河決祥符縣杏花營

七月河決延津西冪村泛溢七十餘里又明年徙之縣南

河自延津南徙入封邱而延津遂無河矣本禹貢雖指

九月黃水沖決開封府護城堤居民被災者五百餘家

十一月巡撫李衍奏河南地方累有河患者皆由
下流壅塞以致冲決宜自開封府西南隅新城下
抵梁家淺舊河口七里疏浚壅塞以洩杏花營上
流水勢又自八角河口直抵南頓分道散漫以免
祥符鄆陵諸縣睢陳歸德諸州淹沒其冲決堤口
則俟水落之日興工修築

成化十五年正月遷滎澤縣治於北丁舖以避黃
河水患

成化十八年五月河溢開封府州縣沒禾稼

六月河南諸水皆溢

孝宗弘治二年五月河決開封府黃沙岡蘇村野場
至洛裏堤蓮池高門岡王馬頭紅船灣六處又決
歸頭五處入沁河郡縣多被害而汴梁尤甚時議
遷汴城以避水患巡按御史陳寬等奏曰黃河之
水自古為患所以禦防之者亦惟修築堤岸耳今
幸下流冲決分為數派徐圖修塞豈無善策固不

必多穿漕渠分殺水勢亦不宜輒議遷城搖動人心況當饑饉之餘公私匱乏百爾財力於何仰給於是遷城之議不果行

是年復決金龍口東北至張秋入運河而江荆口并陳留通許二縣俱淤命官治之

是年河決支流為三其一決封邱金龍口漫於祥符長垣下曹濮冲張秋其一出中牟下尉氏其一泛濫於蘭陽儀封考城歸德以至宿遷命刑部尚

書白昂治之役丁夫二十五萬遂塞金龍口於滎
澤開渠導河由陳潁至壽州達於淮又築渠堰於
徐兗瀛滄之間以殺河勢

弘治四年十月黃河溢命有司量賑開封懷慶二
府及歸德宣武睢陽三衛被災之家

是年河決蘭陽

按河之入海自碣石而千乘自千乘而入
淮至是又由汴矣河之三大遭也本河志

弘治五年河溢汴梁之東蘭陽鄆城諸縣皆被其

患又決金龍口東注潰黃陵岡下張秋侍郎陳政
督夫九萬治之弗績

弘治六年二月侍郎陳政卒於任遂命左布政使
陞都察院右副都御史劉大夏總理河道事往治
之大夏疏議得河南山東兩直隸地方西南高阜
東北低下黃河大勢日漸東注究其下流俱妨運
道雖該上源分殺終是勢力浩大較之漕渠數十
餘倍縱有堤防豈能容受若不早圖恐難善後其

河南所決孫家口楊家口等處勢若建瓴皆無築
塞之理欲於下流修治奈水勢已逼尤難為力惟
看得山東河南與直隸大名交界地方黃陵岡南
北古堤十存八九賈魯舊河尚可泄水必修整前
項隄防築塞東注河口盡將河流疏道南去使下
徐沛由淮入海所經州縣禦患隄防俱令隨處整
理庶幾漕河可保無虞仍於張秋鎮南北各造滾
水石壩一座俱長三四十丈中砌石堤一條擬長

十四五里雖有小費可圖經久若黃陵岡等處隄防委任得人可以長久仍照舊疏導汶水接濟運河萬一河再東決壩可以泄水流之漲堤可以禦河流之衝倘或夏秋水漲之時南邊石壩逼近上流河口船隻不便往來則於賈魯河或雙河口徑達張秋北下且免濟寧一帶閘河險阻尤為便利弘治七年九月給事中孫儒奏黃河雖遷徙不常然其勢北高南下至成化間始南高北下今欲治

之先自丁家道口濬其南岸廣二三仞以容狂瀾
復濬桃源宿遷深三四仞以殺水勢開符離歸德
使其勢北高南下沿張秋而上以竿測之於其淺
處樹木橫箔下石築土以攔上流又恐明年春水
泛漲冲決土壩先於張秋迤西開曠之處挑濬湖
蕩以畜潦水然後於其決口厚築堤岸修砌石崖
為便請下治河太監季興平江伯陳銳與劉大夏
酌行從之

按是年命太監李興平江伯陳銳同劉大夏治張秋河十二月築塞決口成功

弘治八年二月築塞黃陵岡及荊隆等口七處旬有五日完工河復南流故道

弘治十一年河決夏邑縣太邱回村等集逕蕭縣出徐州小浮橋

弘治十三年六月河決李家楊家等口橫流曹單等處

弘治十九年河決睢州之野雞岡由汴河入淮於

是開李景高口支河引水出徐閘二年復淤

武宗正德四年河溢皮狐營決曹縣溫家口馮家口
等處又北徙至儀封小宋集而決黃陵岡埽壩溢
入賈魯河敗張家口等處縷水小堤循運河大隄
東南行而賈魯河下流淤塞亦出張家口合而南
注命官塞治

工部侍郎崔巖於祥符董監口寧陵五里鋪各開
地四十里引水由鳳陽達亳州又浚孫家渡故道
十里引水由朱仙鎮至壽州而各入於淮疏賈魯
舊河四十餘里以殺水勢築梁靖口下埽以防冲

決會霖雨暴漲臺邱盡壞巖尋以憂去命李鍾仁
之鍾築長堤自大名至沛縣三百餘里又自滎澤
決水城縣疏通河道以防
清決亡何以兵荒召還京

正德七年九月以右都御史劉愷總理河道愷築
大堤起魏家灣亘八十餘里至雙垌集又續堤三
十里

正德八年劉愷奏河決黃陵岡率衆祭告越二日
河南徙山川效靈祚我國家如此因遣愷祭河伯
之神賜愷羊酒愷於修河之役束手無策因歸功

於神以獻詔諛

正德十年六月以僉都御史趙璜為工部右侍郎
總理河道璜於滎澤縣東濬分水河鄭州西鑿須
水河疏亳州河渠至是水勢漸平

世宗嘉靖五年十二月以章拯為工部侍郎兼僉都
御史會官治河時御史戴金奏黃河入淮之道有
三一自中年至荆山合長淮之水曰渦河一自開
封府經葛岡小壩丁家道口馬牧集駕鵞口徐州

出小浮橋曰汴河一自小壩經歸德府城南飲馬池至文家集經夏邑至宿遷曰白河弘治間黃河變遷渦河白河堙塞而徐州獨受其害若自小壩至宿遷一帶並賈魯河鴛鴦口文家集壅塞之處逐一挑浚則趨淮之水不止一道而徐州水患可以少殺矣又提督漕運總兵官楊宏亦言徐州上流若歸德州小壩河丁家道口河亳州渦河宿遷小河等處俱有黃沁分流支派故道宜於此開浚

或有捷路可開亦從其便庶可以分殺水勢也詔俱下工部議覆將戴金楊宏所奏事宜斟酌應築應浚選委司府勤能官員鳩工庀事以濟漕運

嘉靖七年總督河道右都御史盛應期奏開蘭陽縣趙皮寨白河一帶分殺水勢用工四月弗績坐免

嘉靖八年命工部右侍郎潘希曾兼都察院左僉都御史總理河道希曾言河南儀封縣河患已寧

管河主簿宜草孫家渡口已浚通請於鄭州增設判官一員專駐其地以防復淤從之

嘉靖十一年六月大水溢孟津縣城圯乃議遷於舊城西二十里聖賢莊經始於甲午春二月訖工於夏五月

嘉靖十四年十二月總理河道都御史劉天和條議治河事宜其一自河南原武縣王村厰增築月堤一十里其一孫家渡自正統時全河從此徙弘

治時淤塞隨開隨淤卒不能通今趙皮寨河日漸
廣若再開渡口併入渦河不惟二洪水澀恐亦有
陵寢之憂當如舊閉塞其一蘭陽縣銅瓦廂月河
不必再濬蓋黃河勢難與爭既已趨北不能復使
東注也其一於祥符縣之磐石口蘭陽縣之銅瓦
廂考城縣之蔡家口各添築月堤臣以為黃河之
當防者惟北岸為重其堤岸去河遠者間或僅存
而瀕河者無不冲決當擇其中去河最遠大堤及

去河稍遠中堤塌者增修缺者補完斷絕者接築
使北岸七八百里間聯屬高厚但工役甚鉅而時
詘民貧當以漸修舉上從之

黃河先年由蘭陽縣趙皮寨地方流經考城東明
長垣曹蕭等縣以入徐州近年自趙皮寨南徙由
蘭陽縣儀封歸德寧陵睢州夏邑永城等州縣流
經鳳陽地方入淮其歸德蘭陽等州縣水患頗大
本李如圭
治河疏畧

嘉靖十六年七月命遷夏邑縣城以避河患
是年鑿地丘店野雞岡等口上流河四十餘里

嘉靖十八年正月河道都御史胡纘宗疏議於睢州考城地方新開孫繼口孫祿口各黃河支流處另築長堤及將考城馬牧集等處修堵決口堤務築高廣堅實栽榆柳護之疏入下工部議行

嘉靖十九年濬孫繼口至丁家道口淤河五十里是年河決野雞岡由渦河經亳州入淮二洪大涸兵部侍郎王以旂開李景高支河一道引水出徐濟洪役夫七萬有奇八月而成尋淤

嘉靖二十一年又鑿野雞岡上流李景高口支河
三導河東注以濟二洪

嘉靖二十四年河決野雞岡南至泗州合淮入海
嘉靖二十七年正月於趙皮寨等處穿支河修築
堤防以河決曹縣故也

嘉靖三十二年四月遣侍郎吳鵬視趙皮寨孫家
渡二支河

嘉靖三十八年二月巡撫章煥議於翟家口大開

河口以殺其勢別挑支河培築堤岸以圖永久部議不行

穆宗隆慶四年四月以兵科都給事中溫純言更命河道都御史加提督軍務職銜以南直隸之淮揚潁徐北直隸之大名天津河南之睢陳山東之臨沂及添設曹濮諸道各兵備官屬焉

隆慶五年十月以河南山東大水命工部申飭管河官經理上流以防衝決

隆慶六年七月詔均派山東河南河夫於各州縣
勿偏累瀕河地方

十一月侍郎萬恭言國家財賦仰給東南貢運全
資河道徐州以上河廣廣則水有所匯而縈洄徐
州以下河狹狹則水無所容而泛溢故欲河不為
暴莫若令河專而深欲河專而深莫若束水急而
驟束水急而驟使行地中含堤別無策也前都御
史潘季馴議開一百里故道給事中雒遵議築三

百里長堤入謂太費無益獨荷先皇俞允臣等督
司道官申畫地之約下募夫之令期以九十日而
工止六十期以六萬兩而費僅三萬堤工遂成河
流順軌臣等復念築堤如築邊守堤如守邊又會
題設官布夫建舖編號沿堤修守以此今年黃水
大發而三堤竟不敗河卒無虞北運無一水阻南
還無一水阻因陳各官勞勩請加敘獎工部覆從
之

神宗萬厯元年八月河漲澠池縣張成口深五丈

萬厯三年十月兵科給事中蕭彥上言近日治河諸議俱在徐邳以下於上流俱未之及但以運道為急不以淮泗為念宜令大臣下沿淮安上溯潼關逐一相視孰可分其流孰可殺其勢計畫停妥繪圖立說具奏施行部覆如議

萬厯六年七月總河都御史潘季馴題徐州小浮橋以上一帶河淺查得河南歸德府新集地方下

至徐州二百五十里原係黃河故道欲乘今一併開復以工科給事中王道成言未行

河之黃溢中國也惟急務修築培高堰以來淮水遙堤以求黃流无當秘意經理河南則於家店劉獸醫口黃陵岡陶家店馬家湖銅瓦廂挖泥河煉城口蔡花樹芝蔴庄等溜山東則楊家口梁靖口毛黃寨王家壩侯家村以其地皆埽灣迎溜湍急先年往往失事故當急務修理之若堤堰既堅河淮安流自能久享其利本續文獻通考

萬曆七年十月以兩河工成賞總督河道官潘季馴等銀幣有差仍差科道官勘實以聞

萬歷十五年七月給事中常居敬題開封等府陝州靈寶等州縣淫雨河漲沖決堤岸漂没人畜乞敕河南管河各官捲帛築壩補隙塞決

冬十月命工科給事中常居敬相度黃河議修治之策時黃河漫流自開封府封丘及東明長垣各縣多沖決大學士申時行言失今不治河將北徙上流不下則運道可憂故有是命已而督河楊一魁議因決濟運導沁入衛居敬言衛輝城卑於河

恐一決則有冲潰之患沁水多沙善淤入漕未便
不如堅築決口開河身加浚衛河民得灌田尤為
完計詔從之十一月詔河道堤防不堅易致冲決
嗣後該管官五年內者巡撫奪俸三月道官降級
論劾者從重議處餘年遠者姑免究

是年河決祥符縣劉獸醫口又決蘭陽縣銅瓦廂
又決封邱原武二縣

是年河又決荊隆口

即金龍口

潰堤入長垣東明二縣

尋塞之後二年復勅築遙堤二千九十丈以防漲
漫沁河又決蓮花口金屹壩水浸獲嘉新鄉二縣
尋塞之亦加築堤壩

沁水至武陟與黃河合其湍急之勢較黃甚甚而
武陟東岸之蓮花口金屹壩要害處也今議甃石
四百三十五丈為堤限以三年告竣此堤一成永
遠為利而議者畏難尚未舉行其北岸大樊村亦
係埽灣要害都堤埽壩同河
者當留意焉本河防一覽

萬曆十六年十一月增撫臣勅書兼理河道事

十二月添設河南開封府同知一員駐劄荊隆口

祥符縣縣丞一員榮澤縣主簿一員專管河務

是月工部覆總河潘季馴奏稱河南黃河上流三門潰津而下地平土疎每易冲決特非運道所經往往忽視以為無虞而不知上源既決運道未有不阻者故修守之法在河南尤屬緊要其故道由新集出小浮橋銅幫鐵底所當修復而歲儉費繁未宜舉行惟宜加修庶保無虞因條陳六事一黃河北岸逼漕南岸逼省經先臣劉大夏於兩岸各

築長堤綿亘千有餘里歲久刷汕宜刻期修築一
沁水至武陟合黃而蓮花池金屹嶂其險要也生
靈無算托命一堤而最險處止四百餘丈所當亟
議石堤以圖永賴一河工甚鉅所恃工費止河堡
夫銀近緣併入條鞭任民逋負甚至已徵而別用
竟扣還今議從前借用者如數抵還在民者徵
解貯開封以待不時之用一役民用其民當卹其
私今議開歸河三郡近堤沒官田地給堡老六畝

堡夫五畝不足則以曠工銀置產以授之則民有
身家之患防隄益力一河之害河南為尤大治河
之功在河南尤難往秋防舉劾僅行於淮徐而不
及河南誠為缺典宜一體甄別以示激勸一當以
治淮之法治河責郡邑長吏以一事權數歲修工
程以預興舉增補摠築以固隄防所當通行者也
從之

萬曆十七年六月河決劉獸醫口又漫出李景高

口新隄又冲入夏鎮內河沒壞田廬溺死居民甚衆其餘或水與堤平或堤不沒者尺許至十月塞之

總河潘季馴上治河疏曰黃河經行之地惟河南之土最鬆禹導河入海止經陝州孟縣鞏縣三處皆隸今之河南一府其水未必如今日之濁今自河南之閩鄉起至歸德虞城縣止河經五府流日久土日鬆土愈鬆水愈濁故平時之水以斗計之沙居其六一入伏秋則居其八矣以二升之水載八升之沙非急湍即至沉滯故決口不塞則水分水分則流緩流緩則沙停而旁溢勢所必至也是以黃河防禦為難而中州為尤難自漢迄今東冲西決未有不始自河南緣非運道所經人遂漫不

關心不知上源既決運道必傷往年孫家渡黃陵岡趙皮寨故轍可鑒也弘治年劉大夏於北岸築有長堤一道起自曹縣界至武陟縣詹家店止延袤五百餘里南岸逼近省城亦有長堤一道起自虞城縣至滎澤縣止實為中原屏翰但地鮮老土堤皆浮沙河水一派多難保守今逐一查核分為緩急二工如儀封縣北煉城口舊堤一段舊壩一座南岸普家營新舊月堤蘭陽縣楊家莊至賈家樓舊堤一道南岸自陳留縣至儀封縣界舊堤一段祥符縣劉獸醫口迤南舊堤二段張家灣壩斷老壩一段達後月壩一段又自陶家店至免伯堰埽頭集至舊堤頭長堤二道又劉獸醫口遙堤一道封邱縣荊隆口北中灤城于家店張家莊蕭家莊各有水冲潭窩又會題准荊隆口勑築遙堤一道陽武縣北岸脾沙岡埽壩原武縣舊堤一道滎澤縣北岸長堤一道自朱世花太王廟至王婁店

郭家潭等處俱有潭窩歸德府考城縣北岸芝蔴莊迤東埽壩三段李秀廠東堤決口唐家水口壩基商邱縣南岸楊先口堤以上工程或勦築或加幫或填補皆係險要之處亟宜修舉者也又如儀封縣北岸榮花樹舊堤一段挖泥河舊壩坍塌祥符縣馬家口舊堤三段省城四面大堤一道陽武縣自王祐莊至脾沙岡舊堤南岸自營家莊後至中牟縣圓墩寺舊堤原武縣南岸舊堤二段中牟縣舊堤六段俱應加幫河勢稍緩俟急功完日次第修舉者也兩工告竣則防禦可恃但築堤不難而覓工難若非真正老淤土隨築隨壞徒費無益容臣加意檢察或夾雜浮沙或夯杵不實將河官叅治又查得遙編河堡銀工役所恃為生者也有司視為末務倦於追徵吏書乾沒收頭侵尅近聞併入條鞭解京止餘畸零人戶逋欠糧稍皆作河道錢糧請令追徵立限催比如完不及三分之二

者即遇考滿陞遷不准離任庶知敬惕而鏡糧自裕矣又曰惟河防在隄而守隄在人宜令堤壩之上每二里修一堡房令堡老堡夫常川往守防護堤岸修補坍塌填塞穴窩看守柳株三伏九秋之間不分風雨晝夜防守法至備矣但不周恤人心易怠宜於近堤官地堡老給與六畝堡夫五畝以便耕種稍助食用仍給帖照免其糧差則人心樂為之用而隄防可久矣詔從之本河防一覽

萬曆二十三年初開中年縣河渠及築吳家堂堤

按中年縣知縣陳幼學初開河渠五十七道以洩黃河泛溢之水汀地皆成平地民咸賴之又築吳家堂堤一十六道

萬曆二十九年九月河決蕭家口等處先是開封

歸德二府大水商邱蒙牆寺黃河水發遂冲蕭家
口百餘丈全河盡南注原行河身頃刻變為平沙
商舟不暇解維盡實平沙之上蒙牆向在南岸徙
置北岸商邱虞城多被淹沒巡撫曾如春奏乞命
河臣從冲決源頭下至徐溪口符離橋宿遷小河
口會流處所逐一查勘詳議料理上是其言至十
月大學士沈一貫又言之吏科給事中田大蓋又
言不報

萬曆三十年二月工部尚書楊一魁覆奏巡撫曾如春疏蒙牆寺冲決宜修築汴堤以障南徙又汴堤上自歸德下至靈虹接連歸仁堤數百餘里若河南修完而靈虹一帶亦宜修築高厚始保萬全宿遷小河口乃睢水出洩故道耿車兒灘橫堤年久殘廢急應疏浚小河口培築耿車兒堤使黃流盡歸小河口則瀾漫自消上嘉納之

三月以巡撫曾如春為總理河道提督軍務如春

奏上年蒙牆寺口決勢難南徙而蒙牆寺之下若
徐家口至李吉口百有餘里涓涓之流固在也屹
然之堤如故也此東行故道所宜速為開復者但
故道自歸徐至宿遷不下六百餘里非集夫數千
萬備金百萬兩何能展手臣備查各屬衙門報前
總河庫冊總計不滿三萬之數非發帑無策矣
不報

是時河決蒙牆寺入歸德商永南徙而河與淮會
入洪澤總河曾如春開挑三家口至明年秋工垂

成而單縣蘇莊之河又
之決矣本南河全考

萬曆三十一年正月工部言山東巡撫黃克纘奏
開王家口固為得策而塞蒙牆決口亦屬急務蓋
王家口為蒙牆上源上源既達則下流不宜旁洩
下流洩則沙易壅沙既壅則上源潰決之虞必有
所不免者宜命總河酌覆從之

王家口

在單縣

是月總河曾如春揭稱河工見在銀七十萬兩尚

欠三十萬兩錢糧不繼恐棄前工不報

是年河決歸德府總河曾如春挑北河引水入淮
所決河口廣八十餘丈而新開河僅三十丈水不
能容下流淤淺水遂四溢因漲冲魚臺單縣豐沛
間如春驚悸暴卒

萬歷四十三年八月河決陶家店張家灣由會城
大堤陳留等處入亳州渦河本年冬決口淤平加
築大壩河流復故

萬歷四十七年九月河決脾沙岡水由封邱曹單
至考城復入舊河本年十一月築塞之

熹宗天啟三年五月河決睢陽

莊烈帝崇禎元年二月御史范良彥言河流自銅瓦
廂而東羅家口蘇家林王家壩等處歲修無虛日
所需一應埽料例招商運買緣官價大少故商賈
不承貽累里甲取辦於數百里之外脚力有費催
船有費搬運有費交卸上納有費歲發官銀萬兩

百姓必賠五千中州腹心之地困苦至此因思歲修額銀有司征解不時拖欠數多亦當速抵原數聽河臣湊手即發招商辦買公平價值或使少沾利息人自樂就矣命飭行

崇禎四年夏河決原武湖村舖又決封邱荊隆口敗曹縣塔兒灣太行堤趨張秋六年始塞

崇禎五年六月河決孟津口橫浸數百里

崇禎六年六月北築太行堤西起虞城縣界東抵

沛縣復築縷堤用護太行堤西起虞城界東抵張
村站又上自茶城下歷三山抵雙溝兩岸長堤之
上每三里設鋪一所每鋪設夫十名更設游夫巡
邏

崇禎十五年九月河決朱家寨衝破汴城北門由
曹宋二門而出南入於渦周王恭枋踉蹌走磁州
以巡按御史王漢舟迎之也巡撫高名衡推官黃
澍俱北渡士民溺死甚衆城俱圯賊屯高地獨全

水大半入泗入渦入淮邳亳皆災

時流賊圍開封久人相食守臣謀引黃河灌賊賊知開為備令其黨黑蛇劉都古決河灌城城內之水幾與城平民盡溺死本明史案

十二月命工部侍郎周堪賡修治決河發銀十萬兩期以二月竣工

崇禎十六年二月命周堪賡將修河工繪圖以進堪賡上言河之決口有二一為朱家寨寬二里許一為馬家口兩口相距三十里怒濤千頃工力難

施必廣濬舊渠數十里分殺水勢然後畚鍤可措
顧築濬並舉需夫三萬河南兵火力竭應募者少
不得不借助於鎮撫之兵也乃敕兵部速議令堪
賡刻期興工至四月塞朱家寨決口修堤四百餘
丈馬家口工未就忽冲東岸諸埽至六月堪賡言
馬家決口百二十丈兩岸皆築四之一中間七十
餘丈水深溜急難以措手請俟霜降後興工疏甫
上帝趣鳩工未及奏績而明亡

河南通志卷十四

欽定四庫全書

河南通志卷十五

河防四

河防考

皇清

世祖章皇帝順治元年夏黃河自復故道

秋溫縣河北堤塌三十里村落盡沒

順治二年河決考城縣之流通口次年塞之

順治三年流通口決水北徙午溝至徐州一帶河
流涸竭

順治四年以黃河疏通決口工成河督楊方興巡
撫吳景道加級賞賚有差

順治五年河決蘭陽

順治七年河決封邱朱源寨築荆隆口堤

順治八年築祥符單家寨堤封邱李七寨堤又築

陳橋堤鄭家莊堤

順治九年河決封邱大王廟口冲毀封邱縣城水
從長垣趨東昌壞安平堤北入海大為漕渠梗河
督楊方興巡撫亢得時起大名東昌兗州及河南
丁夫數萬治之旋築旋決乃於丁家寨鑿渠引河
殺其勢祥符時和驛築堤又築常家寨堤商邱王
家壩堤考城王家道口堤
是年河決祥符之朱源寨全河北徙浚支河以分
之越五載始復舊

順治十年武陟沁水決浸及修武

是年築祥符黑岡堤又築回龍廟堤又築李七寨堤又築原武趙家莊堤蘭陽板場堤及月堤又築考城芝蔴莊堤

順治十一年築陽武慕家樓堤商邱夏家樓堤虞城土樓堤考城王家道口堤

是年河趨陽武縣西南潭口寺勢與堤平畚鍤逾兩月始息

順治十二年築祥符守公寨堤回龍廟月堤陳橋
堤蘭陽板廠堤陽武潭口寺堤包家廠堤及封邱
中灤城堤決口始告成又築考城王家道口堤武
陟沁河傅村堤

是年大王廟決口塞

順治十三年築祥符黑岡堤清河集堤蘭陽艾家
樓堤陽武月堤又築堤壩商邱王家壩虞城黃垆
壩又築土樓堤

順治十四年河決祥符之槐疙疸

是年築祥符槐疙疸堤清河集堤魁星樓堤陳留
孟家埠遙堤月堤蘭陽劉家樓堤儀封三家莊堤
陽武堤封邱大王廟樓堤滎澤南岸堤商邱王家
壩堤

是年黃河南徙陳留孟家埠口潰決於堤南築縷
月堤五百丈復築堤一千二百丈陸續坍塌水衝
遙隄知縣張重潤濬河一道引河折入新河南面

遂免冲決

是年浚儀封縣三家莊河長一千丈以殺北來水勢而黃渡河涸為田

順治十五年築祥符黑岡堤常家寨堤儀封三家莊堤封邱楊家樓堤大王廟堤虞城歡堦寺堤是年河復決陽武縣城南慕家樓築河堤賴以無患

順治十六年築祥符陳家寨堤貫臺堤儀封蘇家

樓堤虞城羅家口堤考城王家道口壩

正月初八日總河朱之錫題奏兩河利害疏略云
一議建設柳園河防緊急埽料在手咄嗟之頃轉
危為安然必使生植之數常有餘於採辦之數而
後可以源源相繼宜責令黃河經行各州縣印官
於瀕河處所各置柳園數區或取之官地或近買
民田每園安置堡夫數名布種澆灌而道廳等官
時時稽查秋冬驗明行以勸懲之例將數年遍地

成林以濟河工且節河帑再照官給柳價每束五分既令印官責成里甲均買均運更宜申飭照地均買有柳之家聽其轉售如有包攬指索扣剋準折等弊立行揭報以憑叅究一嚴剔河工弊端如工程有工力不到法式非宜有料物虛浮徒事粉飾之弊如器具有儲備不豫徒手莫施製作草率不堪適用如夫役有扣剋工食有奸豪包佔有賣富簽貧有賄鬻私逃之弊如物料有交修指勒有

扣減價值有折乾肥私有盜用官物之弊然有在
官在衙蠹地棍之不同臣以為在官者宜責司道
府廳互相覺察如隱諱不報治以徇庇在衙蠹土
棍者一如訪蠹之例不時開報庶弊端可除而河
工克濟也一慎重河工職守司廳係河工切要之
員非淡泊無以耐風雨之勞非精細無以察防護
之理非慈斷兼行無以盡羣夫之力非勇往直前
無以應倉猝之機故必豫選熟試果其有才有守

盡心河務即許指實薦舉凡河官縣缺吏部陞補之日許臣歲終題薦官員內照其本等職級循序陞轉庶始終練達駕輕就熟而河防有恃更有請者河差俱以三年為滿惟會通一差一年代更恐初任頭緒不知甫得通曉而報代之期又至且恐以傳舍視之工作不堅錢糧益費亦有可慮合無準照河例改為三年運道河帑均有裨益一交代河防職掌河務重大委署者不惟利害不切即驟

然經營省解不易難免悞事相應將管河道併各
府州縣管河佐貳官如遇陞調降用俱令候代離
任仍將任內修防事宜備造清冊傳告新官違者容臣
指參庶綜理周密便於責成又申明河官需責疏略
云天下事刑名錢穀皆可以文移辦治獨河工一
事非足到眼到不能州縣佐貳忽遇上司差委勢
不敢辭甚至有寧舍河務汎地而勉強從事者猝
有河變豈不悞事請嗣今河官奉委即自行具報

到臣庶萬一有悞責有所歸不報即坐以營求差
委之罪又照按臣考察事關大典但恐河道多故
竟以修防付之老人夫役亦恐害事合無容令該
轄道府代為申明俟河事稍定准赴補考庶責成
專而河防得以有時矣

順治十七年河決陳州郭家埠

是年築祥符班家埠堤魁星樓堤儀封楊家堂堤
封邱新龍口堤商邱蘇家樓堤考城王家道口壩

是年堵塞槐疙疸又河決虞城之羅家口隨塞之
順治十八年築祥符王盧集堤中年遙隄儀封楊
家堂堤考城王家道口壩

聖祖仁皇帝康熙元年六月開封黃練口河決祥符中牟
陽武杞縣通許尉氏扶溝七縣田禾盡被淹沒
七月淇縣河水溢灌入御河浸沒民田甚衆

是年築祥符狼城岡堤馬家店堤陽武姜家莊堤
原武趙家莊堤修商邱高家莊堤虞城侍賓寺堤

康熙二年築祥符單家寨遙堤青谷堆幫堤瓦子
坡堤又與中牟陽武會築堤岸又築陳留梁家寨
堤蘭陽常家樓堤王家樓堤原武趙家莊堤

康熙三年河決杞縣

是年築祥符黑岡月堤陳留貫臺堤蘭陽銅瓦廂
堤儀封蔡家樓堤虞城羅家口縷堤

康熙四年四月河決虞城永城夏邑三縣廬舍田
禾多被淹沒

十月議令督撫責成各州縣專以修護隄防為急務其有無衝決年終造冊報部以定考成

是年築封邱大王廟堤

康熙五年築祥符魁星樓堤黑岡口堤封邱于家店月堤儀封石家樓月堤

康熙六年築祥符黑岡堤中牟黃練集堤陽武穆家樓堤儀封石家樓堤

康熙七年七月彰德屬大雨河水湧漲平地深五

尺傷官民舍甚衆

是年築祥符一覽臺堤聶家寨堤黑岡堤魁星樓
堤陽武趙家寨月堤蘭陽谷家營堤儀封石家樓
堤小宋集堤

康熙八年築祥符瓦子坡堤魁星樓堤陳留梁家
寨堤中牟原墩寺堤蘭陽梁家埠堤谷家營堤

康熙九年閏二月工部覆總河羅多疏奏黃河兩
岸令督臣委官栽柳如能於該督所定之數成活

者其栽柳之人許其三年後查明冊報以巡檢錄用

是年築祥符李七寨堤守公寨堤中牟小潭溪堤原武廟王口堤趙家莊堤封邱大王廟堤河內仁孝寺堤武陟木欒店堤

康熙十年築祥符黑岡堤陳橋堤中牟小潭溪堤儀封石家樓堤鄭州王家樓堤商邱蔚家閣堤考城芝蔴莊堤河內武陟各築沁河堤

康熙十一年虞城黃河水溢

是年築祥符黑岡堤白石岡堤陳留黑家寨堤中牟辛莊縷堤陽武潭口寺堤封邱大王廟堤儀封石家樓堤蔡家樓堤商邱蘇家林堤考城芝蔴莊堤河內大馬口堤武陟大原村堤

康熙十二年正月河南巡撫佟鳳彩疏稱河夫之偏累宜通變也臣查修築黃河每歲用夫或萬餘或七八千名自二三月起直至十月終止俱按地

畝起派似乎公矣其實弊竇有不可勝言者如狡
猾之徒將自己田地飛洒於人勢豪之家將他人
地畝包攬於己甚至紳衿衙役借題優免加以不
肖有司或礙於情面不能秉公持正以致懦弱鄉
愚愈累愈貧每月或三四兩不等方能雇夫一名
即以初雇每月三四兩而言以一歲萬夫計之每
年費至三四十萬矣在

廟堂之上止知河有歲修而不知歲修之夫費百姓如

許之金銀為今之計莫如官雇一策查舊例河工夫役管河道每歲預估用人夫若干方行各州縣按地起派若官雇每夫每月僱價二兩足矣每歲上工九個月每夫止用僱價一十八兩即以萬夫計之止用一十八萬較百姓之自僱每歲三四十萬不啻天淵矣其每歲僱夫若干該銀若干除歲徵河銀外不足者於河南八府一州地畝分別等則每畝派銀若干算明刊於由單內出納亦照地

丁錢糧年終河臣奏銷倘有餘剩留為下年之用如是民知有定額不但狡猾之徒勢豪之家紳衿衙役不能影射倖免即河棍夫頭管工官役輩亦無所施其巧矣臣入境時體訪輿情無不以官催稱便倘謂我

朝制度凡錢糧俱照萬歷年間則例徵收此項銀兩似屬加派不知派銀派夫均出於民而派夫較之派銀所費不啻數倍曷若稍一更變每畝不過加之

毫釐俾得安心於畎畝併不知有河夫之擾不亦
大便利於民乎疏下九卿科道會議派夫派銀仍屬
累民應將豫省河夫停其僉派如遇歲修工程仍
動河道錢糧催覓夫役若錢糧不敷該撫應動某
項錢糧具題可也奉

旨依議

是年築祥符回河寺月隄陳留赫家寨堤中牟陽
武會築堤陽武又築王家店堤封邱築大王廟堤

儀封築蔡家樓堤商邱築禹王廟前堤虞城築劉家莊堤考城築史家樓等處堤

康熙十三年築祥符貫臺堤陽武張家莊堤儀封蔡家樓堤考城芝蔴莊堤

康熙十四年築陽武王家店月堤

康熙十五年築蘭陽銅瓦廂月堤

康熙十六年築中牟小潭溪月堤蘭陽銅瓦廂月堤儀封垌陽集月堤商邱楊家堂月堤虞城周家

樓堤

康熙十九年築祥符白石岡堤中牟小潭溪月堤
及格堤商邱徐家莊月堤又築虞城堤

康熙二十一年築祥符回河寺月堤儀封堽陽集
月堤考城王家道壩

康熙二十二年將河南堤岸工程專令巡撫就近
料理如有應會同總河事情仍移文商確勿致貽
誤

是年築祥符堤陳留楊家寨堤中牟堤原武馬家
渡月堤張家水口堤陽武脾沙岡堤又南岸堤蘭
陽孫家莊月堤又北岸堤儀封陸家口堤又北岸
堤又築鄭州堤又與滎澤會築沈家莊月堤商邱
築傅家莊月堤考城築小閭家集堤

康熙二十三年築原武封邱蘭陽儀封滎澤商邱
虞城考城堤

康熙二十四年總河靳輔題請豁免河南堡夫課

程柳料從之

是年九月總河靳輔巡撫王日藻會疏稱河道全資修守而修守專賴得人黃河兩岸堤工綿遠一官難以兼顧今應裁去濟源縣主簿一員改為蘭陽縣管河主簿與該縣縣丞分防兩岸堤工裁修武縣縣丞一員改為儀封縣管河縣丞與該縣主簿分防兩岸堤工裁封邱縣縣丞一員改為滎澤縣管河縣丞與該縣主簿分防兩岸堤工裁虞城

石榴壩驛驛丞一員另添設虞城縣管河縣丞一員與該縣主簿分防兩岸堤工至陽武縣主簿止可專管北岸堤工其南岸堤應歸該縣縣丞就近管理又原武縣主簿既專管北岸堤工其南岸止有六百餘丈不便添設一官查此工程見在鄭州地界應歸併鄭州州判兼管至於考城北岸堤工界連山東省曹縣境內即歸併曹縣就近修防又山東單縣南岸堤工錯雜於河南省虞城縣堤內應

換歸虞城縣就近修防俟堤工修完之日更換從之

是年築陽武堤封丘龍門口月堤儀封蔡家樓月堤虞城韓家樓堤考城月堤

康熙二十五年築商邱傅家莊月堤

康熙二十六年陽武鄭州會築裴昌廟月堤

康熙三十年四月工部覆會議得河南巡撫閻興邦疏稱丹河發源晉省流入黃河因百姓開渠灌

田外又開大渠直達運河始有小丹河之名也前
河臣議用竹絡裝石塞渠濟漕誠為可行但今重
運俱由中河北上較昔甚早如雨水勻足照河臣
所議用竹絡裝石塞口濟運灌田倘遇亢旱請於
每年三月初一日起至五月十五日止令三日放
水濟漕一日塞口灌田以後聽民便用再搨刀泉
出輝縣蘇門山下乃衛河之源建立五閘蓄水灌
田每年五月初一日封板濟運但五月正民間需

水之候應照河臣所議用竹絡裝石堵塞使泉水
直流濟運餘水灌田至萬金渠出自彰德府安陽
縣西善應村山下至高平村昔人建閘開渠灌田
之後仍歸洹河暢流入衛濟運亦應照河臣所議
如搦刀泉用竹絡裝石使大流濟運餘水灌田既
能濟公亦無妨於農業從之

康熙三十一年蘭陽儀封與長垣會築月堤

康熙三十四年築虞城黃垆壩堤

康熙三十五年移滎澤縣於滎陽郡舊址以避水患

是年三月部覆河南巡撫李國亮疏稱豫省漕糧
廠舊設衛輝府北門外嗣因監兌部員駐劄直隸
大名府小灘隨將漕廠移於本地相沿至今上年
十一月間臣親詣細看衛河一帶舊為行漕故道
直抵通州相應改復衛輝兌運以本省之銀買本
省之米就近盤剝至便從之

康熙三十九年七月總河張鵬翮奏河工事宜一
堤工之宜堅築也凡加幫之堤務將原堤重用夯
礮密打數遍極其堅實而後於上再加新土其砌
築之堤先將平地夯深數寸而後於上加土建築
層層如式夯杵行礮務期堅固照依估定遠近土
方取土加幫不許近堤取土亦不許挖傷民間墳
墓該管員弁不時巡查如有前弊即將承築官叅
究一椿工之宜用整木也凡遇頂冲刷灣之處水

勢湍激務用整木簽釘排椿整柴釘頭鑲壓以資捍禦嗣後購木到工該道廳必躬親圍驗與原估尺寸相符勒令承築人員椿用整木簽釘入地甚深埽用整柴鑲壓方能堅固永久如將木柴截用修築不堅旋修旋壞該道廳不時揭報以憑叅究一埽工之宜覈實也嗣後報險呈詳一到果係險工即令動料搶修一面估計申報以憑稽查如係假捏即以謊報叅處一挑河之弊宜除也凡遇挑

河之工將挑出之土盡堆於原估堤上層層夯礮成堤不許估計散土以滋堆高假河之弊如有前弊不准銷算仍以侵冒悞工叅究一夫役之宜優恤也河工夫役工成之日給與印票該地方官查驗免其雜項差徭一石工之修砌宜得法也嗣後一切石工無論馬牙梅花等椿皆用整木深釘務期極其堅深無論裏面釘頭等石皆照原估置辦鑿鑿極其平整石灰須重篩篩過多用米汁調和

搗杵極其膠粘滿灌而入使之無縫不到又用鐵錠鐵錫聯絡上下合為一體凡有石工將興備料到工該道廳先驗物料次勘工程或物料不堪短少灰米以及修砌草率立即揭報以憑叅究一黃河淤墊之曲處宜取直也直則水流暢快而泥沙不淤查閱河工頂冲大溜之處對岸必有沙嘴挺出此河曲之驗從此曲處挑挖引河以殺水勢則對岸險工可平但挑挖引河需費甚多若挖後引

水必大溜始可成河若逢緩水必至沙淤倒應追
賠是以人心畏懼挑挖多不如式倘嗣後虛應故
事理應賠修若實心任事偶致淤墊請免其賠庶
人無畏縮而河工底績矣一龍尾埽之宜停也河
工工程堅固者首在石工次則密釘馬牙樁以資
捍禦其頂冲大溜之處用丁頭埽密釘大木排樁
深埋入土亦屬有益若平常工程槩用龍尾埽稀
釘排樁淺埋浮土究亦何益宜行停止奉

旨著九卿詹事科道會同速行確議具奏議覆奉

旨依議

康熙四十年三月部議先經臺臣條奏自戴家樓起至儀封縣交界止堤工三十里計長五千餘丈係河南考城縣地方康熙二十五年歸併曹縣修理請將此三十里堤工仍歸河南考城縣修築奉旨這事情著河南巡撫山東巡撫委官會勘定議具奏今據河南巡撫徐潮會同山東巡撫王國昌疏稱

會勘定議查此工前任河臣靳輔奉

皇上面諭觀看全河形勢以河南考城北岸堤工五千餘丈換歸曹縣就近修防歷今十餘年深有益于運道民生應仍遵照改換之成規但查曹縣換歸堤工考邑已協夫五十名茲再議于南北兩岸各縣鄉堡夫內抽撥夫四十名共工食銀一百四十四兩同協夫銀一百八十兩共銀三百二十四兩移解曹縣催夫取具曹縣印領報銷應均如該撫等

所題可也奉

旨依議

康熙四十二年十二月奉

旨朕這次巡幸西省閱視汾渭俱屬大河直與黃河相通
河等處米石似可由黃河運送但聞三門砥柱水
勢甚溜船不能上朕欲親往閱視因陝州知州奏
無路徑斷難行走遂未果行命三貝勒同近御侍
衛往看據回奏云伊等差入乘騎涉河一道閱有

神人鬼三門俱係鑿石開通水從三門流出水勢甚寬水流甚溜古人于岸上鑿有拉船孔眼但未經以船試驗不知可否行走前總河靳輔亦曾奏黃河通于汴河但淤墊年久若行疏導即可運米等語朕至河南閱河南府居各省之中水路四達最為緊要之地應于此處儲積米穀每年米穀豈能必皆豐收但山陝等省間或收成歉薄即可將此積貯米穀修造船隻由黃挽運若到三門砥柱船不能上亦可用于三

門砥柱造船撥運以至山陝誠使河路疏通則商賈
人民大有裨益所宜于無事之時預為籌畫者也豫
省每年解京漕糧二十萬石有奇若將豫省三年漕
糧截留備用則陝西等省雖值歉收之年將來米穀
運至彼處賑濟殊屬有益候明歲遣大臣往看

康熙四十三年八月九卿詹事科道會議得川陝
總督博濟陝西巡撫鄂海山西巡撫噶禮河南巡
撫徐潮疏稱臣等欽遵

諭旨會勘三門其在陝州東北四十里兩岸石山鑿分三
澗中流謂之神門水勢正溜南岸謂之鬼門水更
洶湧北岸謂之人門水略舒緩三門之下約百餘
步則有砥柱再其下二里許則有卧虎灘臣等用
空船從神門順流放下頗覺利便又從卧虎灘下
挽舟上行因係方船又無蓬舵自辰至申僅能拽
行半里復以有蓬舵空船從卧虎灘下乘風繚挽
逆流而上方能從人門徑過又以船載糧三十石

用夫三十餘名從下挽行而上自已至未亦從人
門過去雖船隻可行但溜急灘多水漲則無緯路
今挽空船於二百六十里足行十有七日若係重
載必濡滯時日多費人工似此水路不如陸路為
便倘將漕糧貯於河南府由陸路運至陝州西門
外太陽渡上船計程不過三百餘里馱送不過四
五程車行止需七八日更比河路費省矣又山西
存倉米穀共九十五萬三千九百餘石陝西存倉

米穀九十萬一百餘石甘肅存倉米穀四十一萬
六千六百餘石現貯兩省者尚多若將豫省漕糧
截留三年恐穀多積久必致沴爛應止截留四十
三年漕糧二十餘萬石貯河南府倉其餘漕糧仍
行解京又據陝西巡撫疏稱渭河西至鳳翔東至
潼關由渭入黃由黃入汾可抵山西之平陽但西
船皆方頭平底無舵無蓬其水手又不善於操舟
臣願捐貲於江南處僱覓造船良工熟諳水手使

本地人演習如果可行民船亦照此式修造倘遇
歉收即可將商民船隻挽運又山西巡撫疏稱汾
河自河津縣起至絳州止可行裝載百石之船由
絳州至平陽府城以及洪洞縣可行裝載五六十
石之船惟是介休縣之義堂橋積石纍纍灘多水
急向無緯路自介休至省城又多淤淺必製小船
倣照舢舨船麻陽船之式移咨楚省酌調船匠手
修造教演臣願捐造百隻倘遇歉收即於汾河接

運又稱隨預造有桅有舵有槳之小船三隻內一隻可載糧四十石一隻可載糧三十石一隻可載糧二十石在汾河內演試自省城以至河津縣俱可行走應如該撫所奏但於有積石無繹路并淤墊之處設法修治可也又據河南巡撫疏稱汴河故道一由中牟縣東經祥符等州縣至永城出境歷江南之宿遷而達於淮久矣湮塞皆成陸地一由中牟縣東南經朱仙鎮至沈邱縣出境歷江南

之太和縣達淮係元臣賈魯修濬今名賈魯河現
今通流其上有支河一道貼近黃河止隔一堤若
從新莊挑濬建閘設壩以時啓閉便可放入黃河
由黃河入洛而通舟楫均應如該撫所奏但將淺
處挑濬建閘設壩可也奉

旨依議

康熙四十四年部議巡撫臣趙宏燮疏奏回回寨
與韓羅灣一帶乃祥符陳留蘭陽三縣之連界地

勢極卑後有大堤一道卑矮單薄並無重堤可恃
今估築加幫接高長二千一百三丈連填墊河形
共計土工夫工銀一萬三千三百四十六兩並無
虛冒應如所題速行幫築工完核減造冊題銷可
也奉

旨依議

康熙四十五年六月部覆撫臣汪灝疏稱賈魯河
由舊河身至黃河岸口南北共長十里其緊接賈

魯河之地名曰東趙由舊河身行七里有大堤一道名曰大堤頭自此而北三里至黃河岸口其東南名為新莊應於新莊之黃河涯口築草壩一座至舊河既開勢必將大堤挑斷通水入黃應於堤根設石閘一座既資防患兼備疏蓄至引賈魯河入舊河身則東趙為受水之口亦應於東趙地方建石閘一座引受河水束之入黃二閘一壩以時啓閉可使賈魯河舟楫由黃入洛矣奉

旨依議

康熙四十六年五月十五日

上諭黃河兩岸工程河官修理的好伏汛水長再加謹
防護惟河南黃河上游工程關係最為緊要伏汛
水長著加謹修防其黃堦壩工程更為緊要宜著
賢能官員前往加意防險相度形勢修建挑水壩
挑溜開行

時總河張鵬翮遵即動帑修建挑水壩一座并下
護涯埽七十丈歷年委官駐防至康熙四十八年

二月三十日撫臣
汪灝題准歲修

康熙四十八年六月大雨河漲漫溢蘭陽縣北岸
雷家集堤工二十六丈儀封縣北岸洪邵灣堤工
二十一丈水驛堤斷口四十三丈八尺張家莊堤
斷口二十五丈巡撫汪灝督官搶築

康熙四十九年三月部覆總河趙世顯疏稱河南
虞城縣黃垌壩新建挑水壩一座甚有裨益因對
面沙灘漸次西墊大溜直冲挑水壩之上壩受敵

崖岸坍塌須於挑水壩之上再建挑水壩一座挑溜開行其險工迤裏當日原有舊決河口一道雖有月堤為內障其如堤根正坐河形之內應用柳束填墊壓土堅實月隄之外又有遙堤一道日久殘壞亦應修補至險工埽臺裡戢宜幫寬厚又新建挑水壩之處堤工單薄亦宜加幫又歸德府虞城儀封蘭陽祥符卑薄堤工俱應加幫高厚又鄭州至滎澤縣堤工盡處民築小橫堤一道卑薄之

甚恐黃河水長必至內灌應加幫高厚又武陟木
藥店迎着沁黃交會處堤工卑薄應幫高厚再接
砌三百丈又荊隆口月堤之外又有太黃堤而踐
踏之缺口宜補又蘭陽與長垣交界堤工應加高
子堤三尺蘭陽子堤當年砌築虛鬆又兼地勢卑
窪應幫築堅實袁家寨即洪灣水驛張家莊舊堤
止高七八尺杜家樓前堤止高七尺均應加高三
尺又楊家堂韓李寨堤應行幫寬凡黃河兩岸舊

有月堤格堤護城堤殘缺之處均應幫築以上工程撫臣鹿祐情願率屬捐俸修築又河南堤上柳株寥寥倘遇險工憑何取用應飭州縣河官凡官地之上廣栽柳株務期成活不許奸民盜竊等語議得河南堤係巡撫就近料理如遇水長即飭管河等官協同地方官合力搶護如有仍前怠玩貽誤河工者將管河地方官照黃河例議處仍查明年限着其賠修奉

旨依議

康熙六十年八月河決懷慶府武陟縣之詹家店
馬營口魏家口等處並流直注滑縣長垣東明等
縣入運河將張秋迤南趙王河口對岸漫溢由五
孔橋入鹽河下海巡撫楊宗義率河官駐工堵築
於九月初九日將詹家店魏家口塞之其馬營決
口總河趙世顯率領江南各營弁並樁埽手與民
夫協同巡撫并力在李先鋒莊建壩堵築適

欽差都御史牛鈕翰林院侍講齊蘇勒等至傳諭

聖訓在釘船幫支河口兩岸捲下攔黃埽壩遂於十一

月十二日合龍即於南壩尾接築子堰一道至秦
家廠止而李先鋒莊亦於十二日合龍馬營口於
二十九日合龍

康熙六十一年正月十九日河水溢水復漫漲釘
船幫南壩尾接至秦家廠子堰決斷二十餘丈又
將新築月堤塌斷水由李先鋒莊壩下直逼馬營

口堤工至十八日決開二十餘丈水深溜急無可
堵塞署理總河陳鵬年建議於廣武山下王家溝
挑挖引河一道使水由東南會入滎澤舊縣前入
正河又於沁河口東建挑水壩一座水勢始平於
十二月相繼堵塞之又於馬營口築大月堤一道
自決口東滎澤大堤起至詹家店新築堤頭止又
築滎澤大堤以為遙堤

四月於儀封縣白家樓北岸挑引河長七百丈虞

城縣黃垆壩對岸挑引河長一百六十丈河流通暢

六月初四日夜沁水暴溢衝塌秦家廠北壩臺八丈南壩臺九丈五尺邊埽加鑲塌卸六丈又釘船幫大壩鰲陷四十五丈搶築將成至初六日復陷幸王家溝引河汎水刷寬一百餘丈全河盡注不浸馬營決口總河陳鵬年巡撫楊宗義於廣武山官莊峪挑引河一百四十餘丈以洩水勢至九月

秦家廠南壩甫合龍次日又將北壩尾決開一百
餘丈大溜歸馬營口亦漫開八丈然底埽未動至
十二月初八日寒訖忽冰凌水積將壩尾後埽埽
面漫水二十餘丈馬營口亦漫開八九丈遂併力
搶築至二十一日工竣十二月總河齊蘇勒奏秦
家廠雖合龍斷流現今細水透露正在搶救但細
看情形地勢卑窪非宜建壩之區况兩岸無倚孤
立於巨浸之中勢甚危急故必恃前後有助方能

善後宜急築背後土堤以斷其流多下護壩邊埽
以敵其冲使前後有恃併力捍禦此一定之法也
臣目覩危急不敢遽赴新任隨會撫臣楊宗義帶
同管河道等官議定先治其急星夜將秦家廠攔
河大壩加鑲高厚以捍水勢將馬營口冲斷之堤
於水中接合兩頭以絕其流但時直隆冬土凍難
施因時迫事急不得已設法挖凍趕修以防春汛
其餘修防俟春和土化次第修理庶保萬全也

皇帝雍正元年正月總河齊蘇勒報秦家厰馬營口堤壩完竣河歸故道

二月總河齊蘇勒奏前月雖接堤斷流大溜全歸正河尤宜於馬營口一帶舊堤普律加高培厚於後面添築撐堤一段格堤一道以為重門保障又將秦家厰前草壩前面下埽簷樁層層鑲墊以防頂冲之患再於後面築靠堤月堤俾有倚恃之固今已完工其建築十八里之遙堤併趙庄詹家店

等處埽壩現今人夫協力數日即完但新築各項
堤埽應設堡夫防守河南向無額設椿手埽手凡
遇工程俱係現雇土人做法顛倒徒資糜費臣於
南工選千總二員率領諳練河兵八十名暫駐工
所以防伏秋雨汎以便教習土人按法修防庶無
貽悞

三月總河齊蘇勒奏河自蒙澤以下陳留以上長
二百餘里向因武陟決口大溜趨正河者僅止四

分水力微弱不能攻沙以致河底淤墊已經二年
今全河下注兩邊河岸有僅露尺許者有與水面
平者更有槽不能容漾出旁溢直至兩岸堤根宛
若湖淀者北岸陽武祥符封丘一帶有岔流三道
各寬十五六丈深六七尺逼近堤根繞行五十餘
里始歸正河南岸由清佛寺地方刷成支河一道
寬一百餘丈深一丈四五尺沿堤下注至四十里
始歸正河伏思黃河不宜兩行兩行則勢緩勢緩

則沙停沙停則河底淤高河底淤高則出槽旁溢
致有漫漫之患向年馬營堤原由支河冲刷所致
深為可虞臣同撫臣嵇曾筠詳加商定將兩岸應
築子堤八段共長九千二百八十八丈頂寬一丈
五尺底寬四丈五尺高八尺應築隔堤二段共長
七百八十丈頂寬二丈底寬八丈高一丈二尺倘
俟

題請開工恐緩不濟急故一面發帑修築一面具

題俟工完之日聽撫臣將做過工程用過錢糧核實
造冊請銷

是年築祥符南岸堤七百丈北岸堤一千四十三
丈築封邱堤七十丈築格堤一道長一百九十三
丈其餘堤工因水佔停修

四月添設千總二員兵夫二百名建蓋堡房三十
三座令其駐防巡護遇有急均許調撥應役所食
俸餉在河庫支領按月給發

六月十一日夜風雨大作水溢中牟縣十里店大堤漫口十七丈婁家庄前大堤漫口八丈水由劉家莊南入賈魯河遣兵部侍郎嵇曾筠會同總河齊蘇勒巡撫石文焯駐工修堵其婁家莊漫口於七月合龍十里店漫口於十一月合龍斷流俱於背後建築月堤靠堤以資鞏固

是月築太行堤又沁黃交漲由懷慶府地方姚其營漫灘而出水與堤平決梁家營二鋪營土堤及

詹家店馬營月堤接連榮澤之遙堤格堤漫坍八處由原武舊河身流至七十餘里遇高阜之處而止至二十五日大溜仍歸正河

欽命大學士張鵬翮前往會同侍郎嵇曾筠總河齊蘇勒巡撫石文焯協力修築於七月塞之又各築小堤接合大堤以防秋汛

七月修幫陽武縣之大濱申家潭朱家潭趙家潭琵琶岡靛池閣張家莊七處堤工

九月二十一日狂風水湧決鄭州來童寨民堤二處兼有鄭民悞挖陽武堤放水以致大溜頂冲將中年縣楊橋後官堤漫開十餘丈於是河撫督官分堵陽武決口於十月合龍斷流楊橋決口於十二月合龍併建築月堤靠堤以資捍禦

雍正二年於釘船幫北壩尾直對姚其營北首接築堤工一道長八百七十五丈秦家厰月堤內填實週圍濶長三百七十丈加幫秦家厰北壩尾堤

長七百一十三丈加幫秦家廠靠堤并南壩尾堤
長九百九十一丈加幫詹家店并馬營口堤長二
千六百九十七丈又加幫馬營口格堤長一百九
十三丈又加幫遙堤自沁河堤頭起至榮澤大堤
止長五千八百六十一丈又馬營口詹家店後接
築格堤二道共長七百四十三丈

正月兵部侍郎嵇曾筠疏奏沁黃交會姚其營秦
家廠一帶皆屬頂冲但此係下流受患其上流必

有致患之由臣由武陟至孟縣所屬皆有沙灘將
大溜逼趨南岸至倉頭對面又橫長一灘自北岸
伸出使全河之水直趨廣武山根以致土崖汕刷
至官莊峪則大溜又為山嘴所挑直注東北於是
姚其營秦家廠遂為頂冲矣臣以為下流固須堵
築上流尤貴疏通應於倉頭對面所長橫灘開引
河一道直接中泓俾水勢順流由西北徑達東南
不致激射東北則姚其營秦家廠可免頂冲之患

再釘船幫大壩甚屬有益但孤立水濱惜少輔佐
須鑲建雁翅以資幫護更於大壩上下相度地勢
添建挑水壩二三座挑溜開行庶秦家廠頂冲之
勢可減壩工賴以永固矣奉

旨依議

是年於姚其營秦家廠建雁翅壩一座東西挑水
壩二座倉頭對面引河六百三十丈次第於四月
竣工

四月以兵部侍郎嵇曾筠為副總河駐劄武陟縣
地方專管河南河務就近撥河南撫標守備一員
千總一員把總二員馬步兵丁一百名聽其差遣
按季更替

是月添設開封府上南河同知一員上北河同知
一員懷屬黃河同知一員沁河主簿一員并於江
南十河營內抽調千總二員把總四員河兵一千
名來豫分派防守一年一換其所撥河兵應給糧

餉即於河南藩庫支給將江南河庫兵餉開除

七月因武陟決口已修將守護險工一年滿限文

武員升題准議叙

是月部覆議得總河齊蘇勒疏稱豫省改設河兵一事令臣酌撥分給聽副總河就近使用臣即將江南十營河兵一千名并檢選千總三員把總三員帶領赴豫會同副總河及撫臣商定隨將所撥河兵守武陟縣北岸險工處所除先經題設千總

二員河兵一百名堡夫一百名外今又安置河兵
一百四十三名委令原設千總管轄陽武封邱二
縣北岸險工處所安置河兵二百六十名派委千
總唐相管轄祥符陳留蘭陽儀封四縣北岸險工
處所安置河兵一百名派委千總李斌管轄滎澤
鄭州二處南岸險工處所安置河兵一百四十六
名派委千總劉國傑管轄陽武中牟二縣南岸險
工處所安置河兵一百四十四名派委把總李應

婁管轄祥符陳留蘭陽儀封四縣南岸險工處所
安置河兵二百零七名派委把總張祿耿宜管轄
以上北岸共安置河兵五百零三名南岸共安置
河兵四百九十七名其所食江南河庫糧餉已經
開除令就於河南藩庫支給將此項兵一年一換
即於堤上苫蓋窩鋪令其就近栖止以便策應靈
捷再武陟縣臣等前經題請添設千總二員河兵
一百名堡夫一百名此項堡夫未便裁革應仍留

以防要工其餘南北兩岸堡夫俟過汛水落工平
盡行裁汰以節工食以充兵餉應各如該督所奏
奉

旨依議

八月修築鄭州石家橋迤東埽工一百二十丈復
於埽灣接鑲防風一千一百一十丈並下水頭接
築礮嘴壩一座又於中牟縣拉牌寨鑲墊工長二
百五十丈下護崖埽長一百六十丈並建礮嘴挑

水壩二座又加幫斷堤至大堤長二十五丈以捍
大溜頂冲

是月修築陽武縣黃河北岸堤工及祥符珠水牛
趙二處堤工於釘船幫挖槽下護崖埽加鑲壩以
禦沁黃冲刷

是年加幫南岸堤工共長七萬六千四百餘丈北
岸堤工共長四萬八千一百餘丈

雍正三年正月巡撫田文鏡奏言仍留堡夫以重

河防該臣看得豫省酌撥江南河兵一案前准部
覆除武陟縣仍留堡夫一百名以防要工其餘南
北兩岸堡夫秋後盡行裁汰等因隨行管河道遵
照去後茲據管河道陳世倬詳稱黃河兩岸堤工
綿亘千有餘里向設堡夫九百餘名令其按堡修
防嗣因黃水連年泛漲堤工在在危急堡夫為數
無多不足修防搶護之用酌撥江南河兵一千名
分列各隄共資防禦是河兵之設原以增堡夫之

所不足今南北兩岸新建埽壩歲搶各工不下數十處若設兵裁夫則防守之人仍不足用難免顧此失彼之慮且歸德府屬之商邱考城虞城等縣並未派列河兵若裁去堡夫則數百里頂冲險堤竟無一人防視矣伏查河臣齊蘇勒疏內稱俟過秋汎水落工平盡行裁汰但每年俱有水長水發之時非一落之後竟不長發也堡夫甫裁而挑汎即屆加幫大堤又係新築之土更須巡防保護新

來河兵雖捲埽下埽鑲墊打椿固所熟諳然而一
年一換新舊接替本處之地形水勢未必深知至
於搜索狼窩獾洞鼠穴水溝雨溜時加填補及瞻
望水勢風防雨守無分寒暑晝夜是河兵又不如
土著堡夫之熟悉也務須兵夫兼用協力修防方
有實效所有原設堡夫斷難裁汰再查堡夫工食
又係各州縣於額設各役工食內撥給並無額外
增加之項更無庸裁惟於給發工食時嚴加確核

務令均沾實惠不使稍有虛冒再堡夫中如有學
習椿埽鑲填等事試驗得實者即准其充補河兵
以免淮兵遠涉之勞仍招募土著勤壯之人頂補
堡夫勿致額缺庶幾兵夫協力防守得宜矣奉

旨依議

五月挑祥符縣回回寨引河長三百四十丈

七月河決儀封之大塞蘭陽之板廠決口各十餘
丈

命巡撫田文鏡會同副總河嵇曾筠率各屬河員併力
搶築被災人民委員查賑其疎防各官吏止停其
議叙不必叅處賠修亦着寬免

七月巡撫田文鏡奏稱臣伏查豫省兩岸堤工關
係運道民生因原額堡夫不足防禦撥江南十河
營兵千名千把總六員分派險要嗣因正副總河
議請裁去堡夫經臣題請照舊仍留併令堡夫跟
隨河兵學習椿埽鑲墊等事於每年南兵將換之

時試驗得實即准其拔作河兵以免淮兵遠涉之
勞但臣伏思堡夫之欲學習樁埽必須責令河兵
教導而河兵之四散逍遙必須分責河員董率或
一月一試或按季一試內有教習勤而成就多者
則給賞以獎勵之或有懶於指示怠於學習者則
責治以儆戒之方克有濟臣查撥到河兵雖有千
總把總為之管轄然而官卑職小不足以資彈壓
況南北兩岸堤長千里一時耳目難周約束不及

至於印河各官則又文武不相統攝勿論其不能
令河兵教習堡夫即遇有險工亦多不服驅使雖
有河兵之名究難收河兵之效臣愚以為守巡二
道舊有兼帶兵備之銜而撥到河兵又無操演營
務之事原與堡夫不相上下應請責令管河道統
攝稽查并分責各河同知董司教習如有怠惰不
服者許管河道徑行責治并許各河同知會同千
把總究處如此河兵必咸知法度不敢抗違而堡

夫學習繕埽等事亦易於成功不過二三年內盡
皆請曉明白均可拔作河兵毋庸再調南兵矣如
蒙

俞允惟將管河道

勅書內加入此款便可遵循矣奉

旨依議

十月初六日部覆總河齊蘇勒奏言黃河兩岸附
近空闊官地令官民弁兵栽柳種葦議定勸懲之

法其官員栽柳成活五千株者紀錄一次成活一萬株者紀錄二次成活一萬五千株者紀錄三次成活二萬株者准加一級種葦一頃者紀錄一次二頃者紀錄二次三頃者紀錄三次四頃者准加一級其殷實之民有能情願栽柳二萬株種葦四頃者准給與頂帶榮身至於河營目兵每兵一名每年栽柳一百株若不能如數栽植及補栽柳秧成活不及一半或河兵內有將附近民柳借端砍

伐者即將河兵究處其專汎之千把總守備等分
別查叅議處俱限於冬末春初廣為栽種次年春
末夏初查驗成活數目造冊報部分別議叙仍令
督撫將官民地界查勘分別不許侵佔以垂永久
倘印河文武員弁希圖議叙將民地指為官地栽
植柳葦有累居民者該督撫即行題叅從重治罪
自雍正四年為始著為定例奉

旨依議

雍正四年三月修築鄭州等處堤工三千五百二十丈祥符等處南岸堤工二萬二千四百六十七丈考城等處堤工五千九十四丈武陟縣堤工二千四百五十三丈原武等處堤工五千八十一丈又修祥符縣北岸堤工一萬三千三百二十六丈

十二月初九日黃河清自陝州至虞城縣澄流見底至次年正月初十日復故普天同慶各官加級

有差

雍正五年二月諸王大學士九卿會議得副總河
嵇曾筠奏豫省大工以及搶修埽料秣稽俱係臨
時濟急購運艱難每百觔實銷銀九分並穀草椿
蔴萬難議減俱毋庸議外其歲修所用秣稽應如
所請行令副總河於雍正五年承辦六年歲修其
所用秣稽酌定足用數目務於八月內動支道庫
銀兩給發各廳勒限十月內照額辦足責令管河

道查驗如有限內不完將承辦之員叅處俟工完之日將用過數目核實每百觔即照七分報銷至柳束係埽料必需之物其豫省向有柳園若干現今坍塌若干應行巡撫責令沿河州縣等官將現存柳園并從前坍塌及新淤地畝逐一查丈立界嚴督河員廣為種植二三年間不惟秣稽可省抑且埽料足用又稱沿河州縣官有嫻熟河務者准令河臣會同撫臣保題陞調河工道廳其河工廳

汎官有才守兼優者亦准令河臣會同撫臣保題
陞調沿河府州縣倘徇情陞調貽悞地方河工者
除將該員照例治罪外仍將保題不實之上司照
濫舉匪人例議處又稱豫省堤工向曾調撥江南
河兵一千名分派防守嗣經請明將兩岸堡夫仍
留學習樁埽如果熟諳補充河兵將南兵發回原
汛以免跋涉今應於堡夫內逐漸拔補足額即將
南兵逐漸扣除發回其撥來之千把總六員亦應

發回本汛不便久留豫省應請專設千總二員把
總四員分隸開封府南岸河廳管轄至歸德府通
判汛內應將原設武陟千總二員內調往一員分
撥河兵一百名移駐歸德各工交與該弁管領應
如所請仍飭各廳嚴加約束又稱豫省大堤舊制
每二里設立堡房一座以便堡夫棲身修守因年
久塌毀十無一二前南兵到來竟無地容身仍照
舊制行令地方官建造每座約銀三兩即於節省

項內動支報銷又臨河月堤居其大半堡房未設
防守無人應如所請着地方官亦如前制建造堡
房其堡夫既稱不必另設即於河兵一千名內酌
量調撥防守月堤仍將造過堡房查明報部題銷
又稱開封府祥符縣堤長八十餘里止有縣丞一
員近日險汛下移祥符一帶工程更為險要應將
開封府南岸添設主簿一員於開封府下北河地
方添設巡檢二員一駐祥符陳留適中之地一駐

蘭陽儀封適中之地如遇險工協同廳汛募夫辦料竭力搶護所有一切逃盜事宜令其稽察其祥符等處北岸太黃堤一道併令該員管理修墊應如所請酌量題補其俸工等項令河南巡撫酌議題奏又稱江南黃運兩河凡遇歲搶工程俱有柳船載料撥運今豫省上自武陟下至虞城歲搶二工撥運無船不能濟急應如所請照依江南梭船寬長丈尺式樣每汛造船五隻給發各汛河兵運

駕看守如河兵不勤照管致有損失著令該管廳汛
賠修奉

旨依議

是月部覆議得河南巡撫田文鏡疏稱豫省南北
兩岸大堤關係運道民生極其重大我

皇上軫念河防不惜百萬帑金多方修築又設歲搶相
機銀兩以備急需河兵堡夫以資保護

聖謨睿算詳密無遺但河性變遷不常當汛水長發之

時素稱平易者忽成險要宜暫用民力每歲於夏至
後將凡有田地村莊相離大堤一二里者傳集公
所各照佃戶多少認夫幾名偶有急工堤上鳴鑼
為號各照所認名數無分雨夜赴工搶護工完立
散若非計日可竣之工按名給與工食在於搶修
項下核實開銷詢據紳士僉稱出一時之夫力享
萬載之安瀾並無不便之處輿情允協倘非汎水
長發之時亦非忽成險工之處河印汎弁各員藉

此冒銷工帑擾累里民並令紳士富室佃戶用錢
買脫派及一二里外無力窮民者查出即行題叅
革職究擬庶幾行之無弊於堤工不無裨益矣均
如所奏遵行可也奉

旨依議

閏三月巡撫田文鏡請於河北彰衛懷三府復設
守道一員統轄三府稽察吏治并責巡防仍照管
河道之例加以兵備職銜將河北一帶堤工埽壩

廳汎各員河兵堡夫并一應錢糧令就近督率修防小丹河等水利一併令其巡查此外再有零星小泉可濟漕運者俱令斟酌疏通彙流入衛以濟漕運并稽查民間截流盜水之弊部議應如所請奉

旨依議

雍正六年五月挑蘭陽縣雷家寺引河長四百一十丈

雍正七年三月以副總河嵇曾筠為正總河兼管
河南山東兩省河道提督軍務事

閏七月添設懷豫兩河營守備二員凡河工一應
修築事宜令其督率千把總堵築防護其所添守
備員缺即令督臣於河營千總內揀選其在工年
久熟諳河務者照例題補送部引

見

雍正八年五月挑封邱荆隆口引河長三千三百

五十丈

是月奉

旨嵇曾筠調任江南總河以總督田文鏡掌管河東總
河印務

六月十四至十六日大雨河水陡漲大溜頂冲祥
符縣南岸程家寨月堤漂走四埽堤工坍塌過半
督臣田文鏡率領各員役夫萬人晝夜加幫裡戢
一百零四丈七月二十八日工竣

雍正十一年七月二十日大風雨河水漲溢漫決
陳留縣七堡九堡督臣王士俊河臣朱藻阿蘭泰
率領各員募夫堵築時數日內河崖掛淤大灘畢
露得以取土施工因晝夜搶築於八月初八十三
日合龍斷流築七堡月堤一百二十丈大堤五十
五丈九堡月堤二百一十丈大堤一百六十五丈
十月初一日工竣

河南通志卷十五